

Nastanak Džemata

DŽEMAT STUDENATA EKONOMSKOG FAKULTETA U SARAJEVU

str. 2



Džemat studenata Ekonomskog fakulteta u Sarajevu je nastao u novembru 1996. godine. Kroz Džemat je prošlo nekoliko generacija studenata.

HUMANITARNI SEKTOR



Humanitarni sektor Džemata studenata Ekonomskog fakulteta u Sarajevu svojim formalnim osnivanjem počeo je veoma uspješno svoj rad. Prikupljanje novčanih sredstava i namirnica za socijalno ugrožene porodice.

str. 8-9

STIPENDIJE ZA STUDENTE

U decembru 2009. godine Džemat Ekonomskog fakulteta, na zvaničnoj internet stranici www.dzemat-efsa.org, objavio je javni konkurs za stipendiranje studenata Ekonomskog fakulteta.

str. 3

SPORT I REKREACIJA

Reportaže sa izleta i druženja na Igmanu i Bjelašnici.

str. 10-11

PREDAVANJA I EDUKACIJA

Članovi džemata Ekonomskog fakulteta su organizovali razna predavanja kojima je prisustvovao veliki broj studenata. Predavanja su organizovana u Mesdžidu Mladih muslimana i prostorijama Džemata u Morića hanu. Nasmijana i vesela lica nakon završetka druženja su podsticaj da se i dalje, kroz ovaj vid edukacije, nastavi preporučivanje Istine i međusobne ljubavi.

str. 4-7

Ramazan Mubarek



UVOD



Džemat studenata Ekonomskog fakulteta u Sarajevu je nastao u novembru 1996. godine.

Naime, grupa studenata, koja se tada okupila poslije izvršene agresije na našu državu, je odlučila da pokrene neke aktivnosti na Ekonomskom fakultetu, kako bi pomogli svojim kolegama tokom studiranja i kako bi zajedničkim snagama uspjela da izvuče našu zemlju iz krize.

Prvenstveni cilj je bio povezivanje i pomoć studentima Ekonomskog fakulteta u Sarajevu. Svojim radom članovi Džemata su zainteresovali veoma veliki studenata koji su se uključivali u sam rad Džemata. Aktivnostima, ljubaznošću, susretljivošću i prihvatajući svakog onog kome je potrebna pomoć i pomaganjem u raznim situacijama članovi Džemata su prepoznatljivi, kako na Ekonomskom fakultetu, tako i u cijelom društvu.

Iza sebe imamo organizovano oko 31 predavanje iz oblasti ekonomije i Islama, 100 iftara na kojima je bilo prisutno oko 15.000 studenata, razna putovanja, sportska takmičenja, besplatne instrukcije, pomoć povratnicima, stipendiranje studenata i još mnogo toga.

Kroz Džemat studenata Ekonomskog fakulteta u Sarajevu je prošlo nekoliko generacija studenata.

Kroz Džemat studenata Ekonomskog fakulteta je već prošlo nekoliko generacija studenata. Neki od njih su danas ugledni menadžeri, biznismeni, političari i ljudi na uglednim radnim mjestima. Prepoznatljivi su po svom ahlak, moralu i razumijevanjem prema svakome.

Džemat studenata Ekonomskog fakulteta je neformalna, nestranačka i nevladina organizacija sa ciljem pomaganja i druženja studenata Ekonomskog fakulteta u Sarajevu pa i šire.

Naš krajnji cilj je da pomazemo jedni drugima, da budemo što bolji i da gradimo respektabilnu poslovnu mrežu koja treba da bude nosilac privrednih aktivnosti u narednim decenijama ali pod motom znanje i vrijedan rad a ne štele i kriminal.



STIPENDIJE ZA STUDENTE EKONOMSKOG FAKULTETA

E. Salamović

*U decembru 2009. godine
Džemat Ekonomskog
fakulteta, na zvaničnoj
internet stranici
www.dzemat-efsa.org,
objavio je javni konkurs za
stipendiranje studenata
Ekonomskog fakulteta.*

Svi studenti Ekonomskog fakulteta su se mogli prijaviti. Konkurs je bio otvoren 7 dana i ukupno su se prijavila 23 studenata. U 2010. godini 13 studenata će primati stipendiju, i to: 10 studenata po 100,00 KM i 3 studenata po 50,00 KM. Kriteriji za odabir stipendista bili su: socijalno stanje, uspjeh na fakultetu i zalaganje u radu Džemata Ekonomskog fakulteta.

Na ugodnom predavanju u petak, 29.01.2010. godine u Morića hanu, koje je održao profesor Kenan Musić, magistar hadisa, hafiz Časnog Kur'ana, svečano su proglašeni dobitnici stipendije koji su tom prilikom potpisali ugovor.

Projekat stipendiranja studenata sastojat će se od raspodjele sredstava u mjesečnim intervalima u periodu od 10 mjeseci. Aktivnosti oko stipendiranja studenata vodi sektor za stipendije. Studenti Edin Salamović i Lejla Avdagić su kontaktirali stipenditore, upoznali ih o toku projekta i prikupili novac za isplatu stipendija za mjesec februar 2010. Dodjela stipendija se vrši na redovnim sastancima Džemata i to do polovine tog mjeseca.

Osim toga, Sektor za stipendije je prikupio sredstva za mart, april i

maj 2010. godine koja su podijeljena na sedmičnim sastancima Džemata.

Cilj nam je da se i na ovaj način kod primaoca stipendije jača svijest o pripadnosti Džemata, koji kao organizacija studenata islamske vjeroispovijesti, pomaže studentima, podstiče ih i poboljšava uslove studiranja.

Dobitnici stipendija su dužni prisustvovati sedmičnim sastancima Džemata, aktivno učestvovati u radu Džemata i s obzirom da su podijeljeni u sektore, obavljati svoje dužnosti predano i odgovorno. Nosioci sektora su dužni praviti dvomjesečne izvještaje o radu.

Spisak studenata koji su dobili stipendiju:

1. Sabina Sinanovic
2. Selimovic Melisa
3. Edina Trnka
4. Lejla Salkanovic
5. Lutvic Halisa
6. Alma Cokic
7. Jasna Cokic
8. Zejfa Zivalj
9. Edita Ilhana Bektic
10. Amar Halilovic
11. Edin Salamovic
12. Lejla Avdagic
13. Nihad Obralic

PREDAVANJA

E. Trnka

Članovi džemata Ekonomskog fakulteta su organizovali predavanje na temu "Islamom do bračne sreće" predavača prof. Elvedina Pezića koje je ispunilo naša očekivanja. Mesdžid Mladih muslimana, u čijim se prostorijama odžalo navedeno predavanje, je bio popunjen do posljednjeg mjesta. Nasmijana i vesela lica nakon završetka druženja su podsticaj da i dalje nastavimo preporučivati Istinu i međusobnu ljubav. Uvaženi profesor je na početku pokušao dati neke uopštene savjete kako doći do sreće koja je nama na dohvat ruke, koju svaki razuman čovjek želi postići i na koji način sprovesti date savjete u djelo.

„O vjernici, bojte se Allaha istinskom bogobojažnošću i umirite samo kao muslimani.“

Zahvala pripada Uzvišenom Allahu, samo Njega obožavamo i samo od Njega pomoć tražimo, Njemu se utječemo od zla naših duša i zlih djela. Koga Svevišnji Allah uputi, niko ga u zabludu ne može odvesti, a koga u zabludu odvede, niko ga na Pravi put ne može uputiti.

Svjedočimo da nema drugog boga osim Allaha i da je Muhammed sallallahu alejhi ve sellem, Njegov rob i Njegov poslanik.

SAVJETI ZA SUPRUŽNIKE

• Voli supružniku ono što voliš i sebi

Dokaz za ovo je hadis Allahovog Poslanika: „Onaj ko želi da bude udaljen od Vatre i bude uveden u Džennet, neka ne dozvoli da mu dođe smrt a on ne vjeruje u Allah i neka se prema ljudima ponaša onako kako voli da se oni ponašaju prema njemu.“ (Muslim, Nesai, od Abdullaha ibn Amra r.a.)

• Međusobna – obostrana zahvalnost

Rekao je Allahov Poslanik: „Ko nije zahvalan ljudima, on nije zahvalan ni Uzvišenom Allahu“ (Tirmizi, od Ebu Hurejre, sahih-vjerodostojnim ga je ocijenio šejh Albani)

• Međusobno udjeljivanje poklona

Rekao je Allahov Poslanik, sallallahu alejhi ve sellem: „Međusobno razmjenjujte poklone kako bi se zavoljeli.“ (Buharija u Edebul-Mufredu, hasen-Alabni)

• Da supružnici budu spremni da priznaju svoju grešku i da ne smatraju da su baš oni uvijek upravu

• Spremnost jednog da prihvati određene nedostatke i mahane kod supružnika

• Dozivanje bračnog druga najljepšim imenom

U vjerodostojnim predajama se prenosi da je Allahov Poslanik dozivao Aišu r.a. „ja Aiš“ (Buharija u Edebul-Mufredu, sahih-Albani) ili „ja humejra“ (o crvenkastobijela) (Nesai, Sahih-hafiz Ibn Hadžer i Albani)

• Pohvaliti bračnog druga pred drugima

• Čuvanje tajni bračne intime

Allahov Poslanik je kazao: „Zaista su na najlošijem stepenu kod Allaha na Sudnjem danu muškarci koji su imali intimni kontakt sa ženom a nakon toga to širi njene tajne.“ (Muslim)

SAVJETI SUPRUGAMA KAKO DA PRIDOBITU LJUBAV MUŽA

• Lijep doček pri muževom povratku kući

• Vedrina i nasmijanost lica

Allahov Poslanik u tom kontekstu kaže: „Ne podcjenjujete bilo koje dobro djelo, pa makar da sretnoš brata musliman vedrog i nasmijanog lica.“ (Muslim od Ebu Zera r.a.) U drugom hadisu je spomenuto: „Vedrina lica i osmjeh prilikom susreta sa bratom muslimana su sadaka.“ (Tirmizi, vjerodostojnim ga je ocijenio šejh Albani)

• Uljepšavanje supruge svome mužu

• Uljepšavanje glasa - tepanje mužu

• Pokornošću mužu u svemu što traži od nje a da nije u koliziji sa načelima vjere

Rekao je Allahov Poslanik: „Žena koja klanja pet propisanih namaza, posti mjesec ramazana, bude pokorna mužu i čuvala svoju čast, njoj će se otvoriti osam Džennetskih vrata, da uđe na koja hoće.“ (Ahmed, Bezar, Ebu Nua'jm, od Enesa r.a., Abdur-Rahmana ibn Awfa r.a, sahih-vjerodostojnim ga je ocijenio šejh Albani)

• Da supruge bude zadovoljna njihovim materijalnim stanjem

SAVJETI MUŽEVIMA KAKO DA PRIDOBITU LJUBAV SUPRUGE

• Pomaganje u kućnim poslovima

Prenosi se od Aiše r.a. da je kazala: „Božiji Poslanik, sallallahu alejhi ve sellem, usluživao bi svoju porodicu, pa kada bi nastupilo namasko vrijeme izlazio bi iz kuće na namaz.“ (Hadis je zabilježio Buharija).

• Da muž pazi na zdravlje svoje žene

• Ljubomora i ispoljavanje ljubavi prema supruzi

Kaže Aiša r.a.: „Znala sam biti u periodu mjesečnice i piti vodu, pa bi dala posudu sa vodom Poslaniku pa bi stavio svoja usta na mjesto sa kojeg sam ja pila i tako pio vodu.“ (Muslim)

Molim Allaha dž.š. da nagradi uvaženog profesora i sve one koji su na bilo koji način učestvovali u ovoj aktivnosti džemata studenata Ekonomskog fakulteta u Sarajevu.

U organizaciji džemata studenata Ekonomskog fakulteta, dana 23.01.2010. godine poslije jacie namaza, u prostorijama džemata u Morića hanu, organizovano je predavanje na temu "Vrijednost sticanja znanja" je održao Hfz. Kenan Musić.

Samo okupljanje se sastojalo iz više cjelina, prvo je hafiz održao predavanje, potom su proglašeni stipendisti za 2009/2010. godinu, a zatim je izvršena akcija prikupljanja sredstava namijenjenih za pomoć, koja je uspješno završila sa prikupljenih više od 180,00 KM.

Ono što treba naglasiti je da je prostorija u kojoj je održano predavanje bila do posljednje mjesta popunjena jer svi koji su prije posjećivali predavanja Hfz. Musića su i ovog puta očekivali nešto posebno, jedinstveno, a tu nisu u pitanju samo riječi već i interpretacija.

ZNANJE PRIJE DJELA I RIJEČI

Kada je Muhammed saws jednom vidio Hatidžu r.a. izmorenu poslije napornog dana, rekao joj je sljedeće: "Znaj da imaš nagradu prema trudu koji si utrošila da bi to obavila."

Gospodar nas u Kur'anu na više mjesta ***podsjeca da će Njegovu milost zaslužiti oni koji u Njega budu vjerovali i dobra djela činili. Da bismo činili dobra djela, moramo znati njihovu vrijednost. Na mnogo mjesta u Kur'anu se spominje znanje, učenje, pa su tako i prvi objavljeni ajeti Muhammedu s.a.w.s. bili:***

"Uči u ime svoga Gospodara koji stvara, koji je čovjeka stvorio od ugruška. Uči, plemenit je Gospodar tvoj, koji je podučio čovjeka da se perom služi."

Dakle, učimo da bi smo znali Da bismo znali ne samo vjeru, već da bismo znali Allaha dž.š. jer samo ukoliko njega spoznajemo, voljet ćemo ga, a voljeti znači djelovati,

znači u Njegovo ime dobra djela činiti.

Tako Allah dž.š. u Kur'anu kaže: "Znaj, da je On Allah, nema drugog osim Njega." Ne kaže se veruj, nego znaj. Ukoliko se budemo trudili na putu znanja, znanje će nam zatvoriti put nemara koji je jedan od glavnih uzroka grijeha jer grijehe ne čine samo oni koji ne vjeruju u Gospodara već i oni koji vjeruju, ali koje je nemar savladao. Zato nijedna bolest nije opasnija od nemara prema Gospodaru.

Prenosi se hadis u kom se kaže: "Ona osoba koja krene na put traženja znanja, toj osobi Allah dž.š. pomogne na putu do dženneta."

Znači, samim traženjem znanja, shvatamo koliku blagodat nam Gospodar pruža i postajemo zahvalni. A kada mu zahvalni postanemo, ta blagodat se još više uvećava. To potvrđuje i slijedeći ajet: "... ako budete zahvalni, Ja ću vam, zacijelo, još više dati..." (blagodati). A izvor znanja je Njegova Knjiga, zato su vjernici i vjernice oni kojima se povećava iman kad im se Allahovi ajeti govore.

Zbog važnosti znanja, trebamo upućivati slijedeću dovu: "Rabbi zidni ilma" (Gospodaru moj, povećaj mi znanje), jer kako kaže slijedeća izreka "Znanje ti je bolje od imetka, jer ti se trudiš da svoj imetak sačuvaš, a znanje tebe čuva".

Spoznavom Boga, spoznajemo Njegovu veličinu i zato se Uzvišenog Allaha od robova Njegovih boje smo oni koji su učeni. Tako da se kaže da nema alima osim onih koji se Allaha iskreno boje. Nadajući se

Njegovoj blagodati, a istovremeno i osjećajući strah, a i ljubav prema Njemu, mi radimo ono čime će on biti zadovoljan. "A Allah voli one koji drugima dobro čine." Zato je ihsan, koji znači dobročinstvo, najveći stepen vjerovanja. Ihsan se opisuje kao stanje u kome se robuje Gospodaru kao da ga vidimo.

Onaj koji teži znanju i ihsanu, čini dobro. To dobro radi iskreno i do kraja. "A Allah zaista pomaže Svoga roba, dokle god on pomaže svoga brata ili sestru."

Da nas Allah učvrsti na putu sticanja znanja i da nas sačuva od znanja od kog nema koristi. Amin.

Upoznajte Poslanika s.a.w.s.

E. Trnka

Dana 12.3.2010. godine poslije akšam namaza, u mesdžidu u Morića hanu, u organizaciji džemata studenata Ekonomskog fakulteta, profesor Abdusamed Bušatlić je održao predavanje na temu „Upoznajte Poslanika s.a.w.s.“

Na samom početku predavač je naglasio osnovni razlog dolaska Muhammeda s.a.w.s., a to je iskazivanje Allahove milosti prema nama „Mi te nismo poslali osim kao milost svjetovima.“ (Ar-Rahman). U ovom ajetu imamo dvije negacije, baš zbog naglašavanja poente.

PREZENTACIJA ISLAMA

Danas svi pričamo o islamu. Ljudi koji žive islam, odnosno u skladu s islamom, oni koji se svađaju oko interpretacija islama i treći, oni koje možemo nazvati sudbinski predodređenima da napadaju.

On čime mi trebamo težiti je prva grupa, ne trebamo se raspravljati jer ćemo tako doći u drugu grupu, već umjesto toga trebamo čitati zapise poznatih Evropljana, poput jednog britanskog književnika koji kaže: „Velika je sramota za svakog da, u ovom dobu, sluša kvalifikacije tipa: ‘Islam je lažna vjera i Muhammed je varalica i lažac’. Čini mi se da svijet nije zapamtio lažnijeg i bolnijeg mišljenja od njihovog. Jer, Muhammedove s.a.w.s. riječi i djela prezentiraju nam njega kao milostivog prijatelja ljudskog roda, našeg zajedničkog, blagog i nježnog brata, sina naše pramajke i praoca.“

Trebamo se voditi stopama Muhammeda s.a.w.s., a on je rekao: „Najsavršeniji i imanom najpotpuniji vjernici su oni koji su najljepšeg ahlaka.“

Taj ahlak je suština poslanstva. Jer je još rekao: „Poslan sam da usavršim ljudski moral.“ A kako mi da potvrdimo njegovu misiju? Tako što ćemo izgraditi kod sebe četiri veoma važne osobine koje je i Poslanik s.a.w.s. imao samilost, pravednost, hrabrost i povjerenje.

MILOST

Jedna od te četiri osobine je milost. Sam Poslanik s.a.w.s. je bio oličenje milosti



Veliki broj prisutnih

prema sljedbenicima i to je ostavio u nasljeđe sljedećim generacijama.

U noćnim namazima je dugo ostajao na sedždi i molio Allaha dž.š. sa svoj ummet. Također, na Sudnjem danu će učiniti sedždu ispod Arša i dovit i moliti Allaha sve dok mu ne bude rečeno: „Podigni glavu! Traži, dat će ti se, zauzimaš se, tvoje zauzimanje bit će uvaženo.“ On će na to reći: „O Allahu, moj ummet, moj ummet!“ I bit će mu rečeno: „Danas nećemo iznevjeriti tebe ni tvoj ummet.“

Uporedimo ovo sa današnjom arogancijom koju imamo, a opet se prisjetimo Muhammedove s.a.w.s. milosti prema mušricima kada su muslimani zauzeli Mekku.

Kada je ušao u Mekku, vidio je jednog mušrika kako drhti od straha, jer se bojao muslimana. Međutim, Muhammed s.a.w.s. mu je prišao i blago rekao: „Čovječe, znaj da sam ja sin žene koja je jela hljeb u Mekki.“ Time podsjećajući na svoje porijeklo i da se on ničim ne uzvisuje od ostalih ljudi u Mekki. Toga dana, Halid ibn Velid nije se mogao suzdržati, a da ne zaprijeti nevjernicima. On je naišao pored vođa plemena Kurejš i rekao im: „Ovo je dan pokolja!“ To je čuo Poslanik s.a.w.s., pa je rekao: „Ne, nego je ovo dan milosti!“

Istog dana došao je i Osman ibn Talha sa ključevima od Kabe. Muhammed s.a.w.s. ih je uzeo, otključao Kabu, klanjao namaz, a zatim je ključeve vratio Osmanu ibn Talhi, koji je još uvijek bio mušrik, i rekao mu: „Uzmi ih, oni pripadaju tvojoj porodici i od vas ih neće uzeti osim zulumčar.“ Osman je vjerovatno volio da je propao u zemlju nego što je čuo

te riječi, jer se prisjetio onoga dana kada je Poslanik s.a.w.s. bio usamljen, utjerivan u laž i odbačen, i kada je tražio ključeve od Osmana, a on je odbio da mu ih da. Tada mu je Poslanik s.a.w.s. rekao: „Kako ćeš se ponašati onoga dana kada se ključevi nađu u mojoj ruci i kada ja budem odlučivao kome ću ih dati?“ Osman je rekao: „Ako Kurejšije dožive taj dan, to će biti dan njihovog poniženja.“ Odgovorio mu je: „Ne, nego će to biti dan njihovog ponosa i napretka.“ Podsjetio ga je Poslanik s.a.w.s. na taj dan, rekavši: „Osmane, vidiš li da se obistinilo ono što sam ti najavio?“ Osman je razumio poruku, pa je rekao: „Ja svjedočim da si ti Allahov poslanik.“ Uistinu je njegova milost bila ključ kojim je otključavao kapije ljudskih srca.

ALLAHOVA MILOST JE MORE BEZ OBALA

Islam budi u čovjeku uzvišene težnje i budi nade. Svi mi možemo i trebamo težiti Firdevsu, jer uistinu, samo htjeti da se provučemo u Džennet je podcijenjivanje i sebe i Allaha. A Allahova milost je more bez obala. Vjera ne baca u depresiju ni najveće grešnike.

U ajetu 53. u suri Ez-Zumer se kaže: „Reci: ‘O robovi moji koji ste se prema sebi ogriješili, ne gubite nadu u Allahovu milost! Allah će, sigurno, sve grijeha oprostiti; On, doista, mnogo prašta i On je milostiv.’“

Na Arefatu je Poslanik s.a.w.s. rekao: ‘Ostavljam vas na stazi čije su noći bijele kao i dani. Sa nje neće skrenuti osim očiti stradalnik.’

Molimo Allaha dž.š. da budemo od onih koji će u svakom trenutku biti na ovoj stazi. Amin.

Saburom do Dženneta

Dana, 12.4. 2010. godine, poslije akšam namaza, u organizaciji džemata studenata Ekonomskog fakulteta, Abdulvaris Ribo je održao predavanje na temu "Saburom do Dženneta".

Gospodaru naš, podari nam dobro i ovoga i onoga svijeta i sačuvaj nas patnje u vatri. Dobro ovoga svijeta ne može postići bez jedne ključne osobine, a to je sabur.

DEFINICIJA SABURA

Sabur na našem jeziku znači strpljivost, trpiti, podnositi nešto. Zbog svoje velike važnosti u definisanju čovjeka, mnogi su pokušali dati definiciju strpljivosti.

"Strpljivost je pohvalna vrlina ko-jom treba da se okiti svaki musliman i duhovna snaga koja regulira karakter svakog pojedinca."

Ibn Kajjim je rekao: "Sabur je da savladaš dušu kada je uznemirena i ljuta, i da suzdržiš jezik da se drugima žali i jadikuje, i da spriječiš tijelo da čini ono što ne treba."

Ono što treba istaći jeste da ne možemo ni zamisliti nijednog vjernika, odnosno vjernicu bez ove osobine. Sabur kao osobina je usađen u prirodu čovjeka, međutim baš kao i svako sjeme, treba se razvijati. Razvija se u borbi s nefsom. Nefs je inače sve ono što je loše u nama. Ispoljava se u emocijama poput zavisti, srdžbe. Ono što je zadatak čovjeka jeste da ovlada emocijama. Kada to uspijemo, onda smo sagradili sabur.

Duša je jahalica čovjeka koja ga vodi Allahu dž.š., a strpljivost je uzda kojom čovjek upravlja. Ako jahalica nema



Predavač Abdulvaris Ribo

uzde, onda ona sama skreće na razna mjesta. Allah dž.š. se smilovao čovjeku koji je zauzdao svoju jahalicu i vodi je tamo gdje on hoće. Nema uspjeha bez upornosti, a ne možemo biti uporni ako nismo strpljivi.

VRSTE SABURA

Sabur u izvršavanju Božijih zapovijedi (namaza, posta itd.)

Mnogi na putu vjere odustaju, upravo zbog nedostatka sabura. Uzmimo za primjer namaz. Ukoliko nemamo ovu osobinu, nije problem redovno klanjati 1-2 godine, međutim, za cijeli život to zahtijeva sabur i njime se pokazuje iskrenost u vjeri. Shodno ovome je i sljedeći ajet: "O vjernici, tražite sebi pomoć u strpljivosti i namazu! Allah je doista na strani strpljivih." (El-Bekare, 153.)

Sabur u izbjegavanju harama

Haram je iskušenje koje imamo na ovom svijetu. Ako ovdje nemamo sabura, ugrozit ćemo vjeru.

Sabur pri odredbama sudbine (kadr)

Ovaj život je naš ispit koji svaki

dan polažemo, padamo, obnavljamo. Nema čovjeka da nikad u životu nije doživio nevolju, zato nam vjera govori da budemo strpljivi, da podnesemo sudbinu, a to je 6. imanski šart (I vjerujem da sve što se događa, biva s Božijom voljom i Božijim određenjem).

Kao što nam je strplivost potrebna u nevolji, potrebna je i u dobru. U nesreći mogu biti strpljivi i vjernici i nevjernici, dok u dobru, svoju strpljivost mogu pokazati samo iskreni vjernici, a njen nedostatak se očituje u tome da nas obuzimaju oholost, samoljublje i prevelika radost, umjesto da zahvaljujemo Allahu, da znamo da ono što smo dobili možemo i izgubiti.

Sabur u međuljudskim odnosima

Čovjek je socijalno biće i često se desi da jedni druge povrijedimo. Međutim, iako možemo uzvratiti, bolje je da otpremo i uputimo dovu za oprost. Jer Allah zaista voli one koji su strpljivi.

Muhammed s.a.w.s. je rekao: "Doći će vrijeme kada će vjeru biti teško očuvati kao što je teško očuvati žeravicu na dlanu. Ako je ispusti ugasit će se, a ako je zadrži opržit će ga." Što je žrtva veća, veća je i nagrada. Tako, ako neko ima veću strpljivost, imat će i veću nagradu. Allah dž.š. u Kur'anu kaže: "Ja sam ih danas nagradio zato što su strpljivi bili." Namaz, zekat, post su obaveze koje su date da bismo mogli izgraditi sebe, da bismo razvili sabur.

Muhammed s.a.w.s. je rekao da vjernika ne zadesi briga, tuga, ili bol, čak i ubod trna, a da mu Allah, dž. š., time ne izbriše grijeh.

"Samo oni koji budu strpljivi, bit će bez računa nagrađeni"



HUMANITARNI SEKTOR

H. Lutvić *Humanitrani sektor Džemata studenata Ekonomskog fakulteta svojim formalnim osnivanjem počeo je veoma uspješno svoj rad.*

Odmah, po osnivanju sektora, u mjesecu februaru, prikupljena su sredstva u iznosu od 70,00 KM koja su uručena djevojčici Medini i njenom ocu Remziji, koje smo i ranije posjećivali u našim akcijama.

U okviru ovog sektora posjećena je i sestra Fatima Maras, koja je nedavno primila islam.

Prilikom organizovanog predavanja u prostorijama Morića hana postavljena je sergija za prikupljanje novčanih sredstava za naše dalje akcije. Na sergiji je prikupljeno 184,30 KM. Nakon prikupljenih novčanih sredstava 19.3.2010. godine posjetili smo roditelje djevojke Selme Karić koja je oboljela od leukemije. Djevojka ima 16 godina i pohađala



Akcija u DP marketima

je Gazi Husrev-begovu medresu u Sarajevu.

U mjesecu martu 2010. godine je organizovana i humanitarna akcija prikupljanja namirnica. U saradnji sa DP marketima, uz pomoć naših studenata volontera prikupljeno je dosta namirnica od kojih je napravljeno 4 paketa. Posjećene

su četiri porodice slabe finansijske situacije.

U mjesecu aprilu 2010. godine, humanitarni sektor je obavio jednu od svojih redovnih akcija. Naime ponovo je organizovana humanitarna akcija prikupljanja namirnica u DP marketima. Dobrovoljno je prijavljeno 10 studenata koje smo rasporedili u nekoliko poslovnih jedinica.

17.4.2010. godine prikupljale su se namirnice za nekoliko ugroženih porodica. U ponedjeljak 19.4.2010. godine Senad Cvrk, Ibro Džebo i Halisa Lutvić napravili su 3 paketa namirnica. Namirnice smo podijelili porodici Mandžukić na Ilidži, sestri Hadžeri koja živi u Velešićima sa dvoje bolesne djece, i porodici iz Kreševa koji imaju nepokretno dijete. Od naših prikupljenih novčanih sredstava na predavanju održanom u Morića Hanu 12.4.2010. godine podijelili smo navedenim porodicama po 30 KM. Ovim našim činom uz Allahovu dž.š. pomoć usrećili smo još tri porodice našom skromnom pomoći.



Studenti volonteri - prikupljanje namirnica

Posjete

M. Žigonja

Članovi džemata Ekonomskog fakulteta u Sarajevu, 20.01.2010. godine posjetili su Fatimu, ranije Anicu, Karas, nekadašnju katolkinju sada ponosnu muslimanku.

Fatima Anica Karas rođena je 1951. godine i od osme godine živjela na Vratniku. 1980. godine se udala za muža katolika, a nakon sedam godina dobila sina Marija. Muž je iznenada umro na samom kraju 1999. godine. Živi u stanu od 25 kvadrata sa sinom. Sin nije još uvijek primio Islam, ali svoju majku podržava u njenoj odluci.

Islam je prihvatila zbog različitog spleta životnih okolnosti. Najprije, jer je živjela u pretežno muslimanskoj mahali i, kako kaže, oduvijek se divila ženama koje nose maramu i nikab, čak je i njihove slike potajno čuvala.

Ono što je bilo presudno bila je saobraćajna nesreća koju je doživjela u avgustu 2008. Tada je učinila iskrenu dovu Gospodaru svake duše, da je spasi i pomogne obećavši da će Mu biti pokorna. Kada je došla sebi, prvo što je tražila bila je džamija, želeći da postane muslimanka. U svom kazivanju spomenula nam je da su njena majka i baka poginule upravo od saobraćajne nesreće u blizini Alipašino polja, njenom sadašnjem komšiluku.

Nakon određenog vremena, poslije saobraćajne nesreće otišla je u Fahdovu džamiju, raspitujući se na koji način da prihvati Islam. Hatib Fahdove džamije, Nezim ef. Halilovic joj je objasnio da se treba okupati i javno izgovoriti šehadet-posvjedočiti da je samo Allah bog, a da je Muhammed, s.a.w.s. Njegov rob i Njegov poslanik.

Na Fatimi se vidi ushićenje, radost zbog njene odluke. Za sebe govori da je ranije bila slijepa pored

"I NIKO NE ZNA KAKVE IH, KAO NAGRADA ZA ONO ŠTO SU ČINILI, SKRIVENE RADOSTI ČEKAJU."

Qur'an, Sedžda 17 (prijevod značenja)



Fatima sa članovima džemata

očiju, Istina joj je bila blizu, nije je mogla prepoznati, sve do sad.

Kaže da joj je jako bitno što sada hoda uzdignute glave, ponosna na sebe i svoju životnu odluku, bez straha, želeći samo Allahovo s.w.t. zadovoljstvo.

Posebno je sretna što joj je njena sestra dolazila za Bajram da je obiđe, prvi put nakon njenog prihvatanja Islama.

Upoznati Fatimu je zaista bogatstvo, jer je to jedna hrabra osoba, osoba koja je spoznala da za Istinom treba tragati i da za to nikad nije kasno. Fatima se odrekla svog dotadašnjeg života zarad sreće koju sada uživa, na Pravom putu.

Molimo Allaha, s.w.t. da pomogne Fatimu i sve one koji zaista traže Istinu, da je što prije pronađu.



Radost i sreća na licu

SPORT I REKREACIJA



Iako je bilo manjih tehničkih problema, prilikom određivanja datuma polaska zbog sniježnih padavina pa je izlet prolongiran sa subote na nedjelju (14.02.2010. godine.) sve je proteklo u najboljem redu. Za izlet se prijavilo oko 50 studenata, međutim neki studenti su odustali od izleta zbog promjene dana izeta ili zbog drugih razloga.

Autobus sa džematlijama je krenuo ispred Istiklal džamije na Otoci, u 09.00 sati sa ukupno 41 putnikom.

U 10.00 sati smo stigli na odredište, Malo polje na Igmanu. Džematlije su se podjelili u manje grupe te su imali slobodne aktivnosti do 11.00 sati, koje su

iskorištene za igranje fudbala, odbojke kao i grijanje u restoranu uz kahvu i čaj.

Od 11.00 do 12.00 sati je organizovan ručak uz roštilj i zajedničko druženje svih džematlija.

U 12.15 sati je klanjan Podne namaz. Poslije Podne namaza je organizovan obilazak planine, Ratne džamije Igman, skakaonica i vožnja žičarom.

U 15.30 sati je klanjan Ikindija namaz nakon kojeg se krenilo sa pakovanjem i polazak kući u Sarajevo.

U 16.30 sati je autobus stigao na do Istiklal džamije i izlet je sretno okončan.

Džemat studenata Ekonomskog fakulteta u Sarajevu je u skladu sa svojom misijom i godišnjim planom za 2010. godinu, dana 14.02.2010. organizovao izlet na Olimpijsku planinu Igman.



Izlet i druženje na Bjelašnici

A. Halilović

Dana 13. juna 2010. godine Džemat sudenata Ekonomskog fakulteta u Sarajevu je organizovao izlet na olimpijsku planinu Bjelašnicu, na odmaralište u Dejčićima.

Nakon što su se okupili svi prijavljeni izletnici ispred Istiklal džamije na Otoci, oko 9:30 sati autobus sa 31 izletnikom se zaputio na odredište na Bjelašnici. Osim autobusom neki izletnici su išli i privatnim automobilima tako da nas je ukupno bilo oko 35.

Nakon sat vremena lagane vožnje smo stigli na odredište, i odredili lokaciju na kojoj ćemo se smjestiti pored izvora. Preljepo vrijeme, i pravi ljetni dan su nam bili saveznici tako da nije bilo dileme da bi nešto moglo ometati dobar i aktivan odmor.



Džemat u prekrasnom ambijentu

U 11:00 sati je bio spreman roštilj i doručak za izletnike, nakon doručka i osvježenja izletnici su u grupama išli u obilazak planine. Nakon što su se svi vratili, klanjao je Podne namaz. Nakon namaza su organizovane sportske aktivnosti, fudbal za muškarce na obližnjem fudbalskom terenu i odbojka za ženski dio Džemata. Oko 15:00 sati je organizovan ručak, i odmor u prelijepom ambijentu. U 17:00 sati autobus sa izletnicima je krenuo nazad u Sarajevo, nakon stizanja u Istiklal džamiju je klanjana Ikindija.

Konstatirali smo da je izlet bio koristan za sve izletnike.

Vidimo se na sljedećem izletu u još većem broju.



I oni prvi - uvijek prvi

Qur'an, Al-Waqi'a 10 (prijevod značenja)

S. Cvrk

Na kraju ćemo samo navesti jedan odlomak iz teksta koji govori o prednostima i blagodatima što smo dio ummeta Muhameda s.a.w.s. Ovo nam treba biti poticaj da radimo što više za opšte društveno dobro cijele zajednice a ne samo na nama samima. Nadamo se da ćemo i mi biti jedni od onih "I oni prvi – uvijek prvi" koji se spominju u časnom Kur'anu.

„Uzvišeni Allah dž.š. je Musaa a.s., dok je sa njim razgovarao, između ostalog upoznao o dolasku Muhammeda a.s. i njegova Ummeta.

Katade kaže da je Musa a.s. rekao: „Gospodaru moj, u ovim pločama se govori o narodu od koga se bolji pojaviti neće i naređivat će da se čine dobra djela, a zabranjivati nevaljala. Gospodaru moj, daj da to bude moj narod“. „Ne, to će biti Ahmedov narod“, odgovorio je Allah“. Gospodaru moj, u ovim pločama se govori o narodu koji će se među posljednjim pojaviti, a prvi će ući u Džennet. Gospodaru moj, daj da to bude moj narod“. „Ne, to će biti Ahmedov narod“, odgovorio je Allah.

Musa je rekao: „Gospodaru moj, u ovim pločama se govori o narodu koji će svoju knjigu čuvati u grudima i učiti napamet – a prije njih su narodi učili svoju knjigu gledajući, pa kad bi

je zatvorili ništa ne bi zapamtili. Allah će im dati pamćenje kakvo nijednom drugom narodu nije dao. Gospodaru moj, daj da to bude moj narod“. „Ne, to će biti Ahmedov narod“, odgovorio je Allah.

Musa je rekao: „Gospodaru moj, u ovim pločama se govori o narodu koji će vjerovati u ranije i kasnije objave. Borit će se protiv onih koji će srljati krivim putem povodeći se za čoravim lažovom (Dedžalom). Gospodaru moj, daj da to bude moj narod“. „Ne, to će biti Ahmedov narod“, odgovorio je Allah.

Musa je rekao: „Gospodaru moj, u ovim pločama se govori o narodu koji će jesti sadaku i imati nagradu, za razliku od predašnjih naroda čiju je primljenu sadaku gutala vatra, a odbijenu su zvijeri i ptice raznosile. Ovom narodu Ti si propisao da bogati

daju siromašnim. Gospodaru moj, daj da to bude moj narod“. „Ne, to će biti Ahmedov narod“, odgovorio je Allah.

Musa je rekao: „Gospodaru moj, u ovim pločama se govori o narodu kome se kad naumi da uradi dobro djelo pa ga ne uradi, piše nagrada kao da ga je uradio, a ako ga uradi, nagrada mu se uvećava od deset do sedam stotina puta. Gospodaru moj, daj da to bude moj narod“. „Ne, to će biti Ahmedov narod“, odgovorio je Allah.

Musa je rekao: „Gospodaru moj, u ovim pločama se govori o narodu koji će imati pravo na šefa'at (zauzimanje). Gospodaru moj, daj da to bude moj narod“. „Ne, to će biti Ahmedov narod“, odgovorio je Allah.

Kadate dodaje: „Rečeno nam je da je Musa a.s. nakon toga ostavio ploče i zamolio: Allahu moj, daj da i ja budem od Ahmedovih sljedbenika“.

Kazivanja o vjerovjesnicima
Kasasu-l-enbija' Ibn Kesir, str. 335.